

四庫全書

集部

欽定四庫全書

集部  
湛園集卷二

詳校官侍讀學士旨法式善

助教臣常循覆勘

總校官進士臣朱鈴

校對官編修臣嚴福

謄錄監生臣金彥茵

欽定四庫全書

湛園集卷二

翰林院編修姜宸英撰

序

送王少詹使祀南海序

嶽鎮海瀆之有定祀皆本於唐開元禮百川之水惟海  
為大而南海居委輸之極從廣州城南受三江之水分  
東西二道東南直抵甌關西南抵駱越以及東西洋以

往諸國無所不到於四海之中號為尤大稱天池焉故  
祀典獨重南海在周頌般之樂章序謂巡狩祭四嶽河  
海而作則巡狩之祀海其來久矣今康熙二十三年削  
平巨孽中外無事

皇帝將以時巡天下爰考古禮分遣諸朝臣告事山川  
而以詹事府少詹阮亭王公往祀南海惟

國家撫有疆宇大海之中鯨呿鼉擲憑妖鼓怒於波濤  
之內山河為之簸掀日月為之霾曠如是者幾四十年

一旦風恬浪霽纖塵不驚依島之國占風而至瀕海百  
姓含哺嬉遊使吾

皇之德化洋溢無垠神之功亦偉矣南海之神既大而  
靈以默佑我

國家其功尤偉

天子特以使事付公豈無意哉按廣州志廟在州城南  
八十里本非島嶼而陸行山徑崎嶇不若一帆之便昔  
韓退之作廟碑於孔戣之親祀至誇為僅事亦以往時

刺史怠職不虔多委事於副而幾獨能稍稍自異為可  
述耳今

天子既下南巡之

詔惟嶺南地以僻遠不得至度公之往布宣

上德諭所以憂民疾苦之意至備吾知五嶺荒徼俚人  
蜚戶必將如望屬車之清塵趨走恐後者民氣歡悅神  
嗜飲食由是言之則海南萬里清晏呈祥効珍用協贊  
我無疆之

景運豈有極哉一祀事之躬親誠無足道是役也

天子不以屬諸他人而必以公行其果非無意也已

送鄭庶常假省序

龐公隱峴山之南答劉表問曰世人於子孫皆遺之以危吾獨遺之以安遂攜其妻子隱鹿門山採藥不返此處亂世之道宜然若生逢有道而令子孫無失其家學澤及生民乃所謂遺之以安也王霸隱居見令狐氏子來容服甚光舉措有適顧視其兒曹蓬髮歷齒未知禮

則客去愧卧終日不起是時當建武重興聖作物觀之  
會人爭以文學自奮生子不才叱牛傭耕正可恥耳其  
婦護前飾辭解釋真兒女子之見也而范氏侈之為美  
談過矣吾邑平之鄭先生醇德舊學推重鄉里自以前  
代遺老不營人事屏跡杜門日以讀書養性為事屢空  
晏如也余友禹梅其長君本經術為文章務追古人致  
之實用數上公車不第今年始以其經魁南宮列館選  
遇



覃恩封其兩尊人告假歸省行有日矣為禹梅賀者且  
疑為先生所不喜是惡足以知先生哉先生懷竒襲珍  
義不苟就度其心未嘗一日忘蒼生者舉平生未竟之  
志付之禹梅茲其所以為適也已余視戊辰一榜具慶  
者無慮數十人然皆少年速化無足深羨禹梅春秋且  
逾艾先生暨夫人偕老鹿車徜徉於鶴浦之濱早起宴  
息視聽益聰明飲食倍進此豈人力之所能為哉今禹  
梅歸不一年且散館復來自斯以往或乞歸終養或娛

侍京師出則荷組黻之榮入則遂綵衣之奉事君事親  
兩無所欠余自維擄散放廢祿不逮養為禹梅述此譬  
如渴者之談酸津流被煩無濟實用徒自傷恨而已若  
夫鄭氏之樂豈有既哉

送王白民南歸序

禮聞來學不聞往教古之大夫士之致仕居其鄉者為  
父師少師儀禮鄉飲酒與鄉射禮所謂先生是也以教  
其子弟皆不出其里閭蓋古者師弟子授受以道道在

故來學道尊故無往教夫子自行束脩以上未嘗無誨而不往教是鄉先生之義也自後周衰道喪師教益廢漢得遺經於秦火之餘諸儒人自為說國家有大議則必問以經義云何弟子講說必問其何所師受一大師門學徒嘗多至數千人御史大夫張忠辟孫寶為屬除舍欲令授子經寶自劾去引禮不往教之義忠不敢強蓋是時道雖不明於天下而人知尊經經非師不傳故其所以自待與人所以待之者俱不得以或輕凡以經

學之重而然也古者尊道其次尊經皆不廢師其後科  
舉學盛則經學愈替國家取士不必通經士以專經取  
之不必問其家學所自於是士之抱經以處者感感靡  
騁田舍翁積十斛米得折東而召之矣北魏元欽性鄙  
恠嘗託高僧壽為子求師師至未幾逃去以讓僧壽僧  
壽性滑稽謂欽曰凡人絕粒七日乃死始經五朝便爾  
逃遁誠非去食就信之義欽乃大慙蓋當時之風俗已  
如此今世孤儒窶生常不遠數千里負笈以求為人之

師猶不可必得幸而得之自非數習禮教舊家善族其  
視遇其師不啻厮養譏呵出入窘餓拘囚賓親不得通  
臧婢相侮笑至有流離顛踣無所於歸者師道之不立  
非一日之故也友人王子白民治經有法恬於進取特  
以詩稱江湖間久近且為童子師於京師七八年齒髮  
衰脫落拓塵市囊不蓄一錢今晨來別余告歸余曰行  
哉亟作詩送之又為之序其所以王子任真樂易無翫  
辭失意之色於去就間余為之序不悲王子之不遇徒

以歎夫道廢經絀而時之不古若焉

送陳紫馭遊永康序

陳子以九月戒途遊永康余送而謂之曰子之是行以  
為知己報乎抑將因以有求於彼乎顧視子貌若有所  
不屑而強就之者然豈其亦有所慨於中乎余前年遇  
知於有司與子同已而失意又同計子交遊中知子宜  
無余若者以余之卑賤久羈於此所嘗人情險巇百端  
每悒悒不樂日思買田種菽杜門讀書鼓琴以自娛猶

不能舍此而遽去而知子之必有慨於中者以予信之也子姑慎其所往哉婺州山水豐厚人物敦樸當宋南渡後衣冠避地多出其境宋元之際朱呂學延蔓於八邑至今猶有傳者子負才藝修仁義立然諾持是以往安在其無遇也永康之學初於陳同甫同甫要為粗豪然朱子深愛其材與之往復辨難數萬言卒欲歸之醇正其緒言餘蹟亦垂至今子遊其鄉蓋亦虛往而實歸矣子之師為賢令於彼潔然仁以清無亦以吾言叩之

人不學道老至奄忽遇不遇何足論哉

送馮孟勉西遊序

維歲之春予友秦君別予而西未數日也馮子孟勉亦來別予將西適吳會放大江觀於洞庭匡廬之勝而稅駕焉二君者皆今之賢君子也予非二子之與遊則不能一朝而樂而相繼以去予則予之悲可知也去年馮子客吳中寄予葛嶼十咏馮子曰葛嶼去吳江縣東五十餘里其地有禽魚葦蒲之樂灌溉之饒居人之環而



食其利者百餘家中有唐隱士張志和祠蓋志和浮家  
泛宅往來苕霅中意此其經遊之處而後人因而祠之  
也宜馮子之有樂乎此也然予讀馮子詩自傷其親戚  
之違離朋友之失處憤悵哀怨若不知有文字之足樂  
與賢人逸士之蹟遺風餘韻之可愛而可傳者必其無  
所樂於中可知也即秦子之言亦猶是也予既悲二子  
之別二子亦復自悲其別然則二子之屢役於西方也  
其亦有不得已者乎余非能不為別也勢不得別耳別

與處奚擇哉方秦子之歸也客有授其琴數引者為予  
奏之鏗然以和醲然其志油油然其自放焉蓋有得於  
中則忘其外其所得愈重則其於外逾輕矣馮子之往  
而復以詩貽予也予固知其不以悲而以懌也

述世德為魏南鄭贈行序

余嘗聞友人沈太史芷岸稱其同年友魏君之賢不置  
也君自舉進士即歸里終養十年間先後為兩母持服  
盡禮極哀鄉黨稱之今來謁選得縣南鄭君不鄙其僻

遠其議論常在濟物謙靜廉儉無時俗嬖阿態以此服太史之知人而私以得交於賢者為幸也八月君暫南歸謀完葬事趨任出其祖父兩世行述請余傳其梗概余覽之嘆曰宜哉魏氏之有後也蓋其積累遠矣魏久家繁昌自君曾祖光祿公再世同居官旌其廬所謂世德是也祖諱之翹字楚材少與兄孝廉君齊名入國子學日讀書好行善若不足孝廉歿撫其子猶子卒以成立族人以有以腴產來鬻者既悔之而力不能贖公立還

其券不取值壽七十二終嘗曰吾家種陰德過百年子孫必有達者惜吾不及見矣子待贈君一公公諱極君一其字也崇禎壬午覃恩選拔貢生試禮部上卷人以公才宜得上第已而遭亂棄去從酒人遊晚年結偶亭偃息其中與道侶詩客往還賦詩口不言時事益耽經論結齋飯僧日以清談為樂然篤於孝友楚材公捐館年艾矣毀至骨立從弟中翰罹禍危甚脫身破產救之僅而免粥餓槁骼設漿以飲道渴者家幾匱不輟亦不

以聞於人也徐孺人有賢行早置側室視惺亭如已生  
子惺亭者南鄭君所自號示不忘其先也公歿年纔五  
十七云自楚材公下兩世單傳繼嗣不絕如綫南鄭君  
年二十一連舉五子今為名進士作吏巖疆當西南倡  
亂時全蜀陷賊漢中為全蜀咽喉王師苦戰其地民膏  
血漬鋒鏑產力疲餽餉今十餘年未復也

天子優詔重軀累選太史之才有守者作收其上用寬  
西顧憂君以經術起家視事首縣必能體吾

君仁惠遺黎之意多方撫輯為諸邑帥且因以大發其家世積德而完其祖父鬱而未竟之施則君之功業所至豈可量哉惟君之舊則既有徵矣曰萬盈數也魏大名也又曰公侯之後必復其始勉矣南鄭其在茲行乎

贈翁同知之任黃州序

黃在春秋時為戰爭之國至三國時為西陵重鎮其地外連大江南通雲夢宋承平無事時王元之蘇子瞻之徒愛其江山之勝始相繼為文詠流傳於後而至今宦

遊者猶聞其遺風而樂之自湖南用兵以來三楚之間  
烽烟相接民卒流亡道路守土之吏供億繁駭朝不謀  
夕而仕於黃者無片甲之擾得以從容几案為

天子牧養小民丞職當漢都尉之任才健者居之其力  
常出郡太守上至近時選授尤稱便所掌兵防巡徼而  
已催科案獄之繁一不以累其心不踰年報最則安坐  
而二千石矣余友杭州翁子武原謁選得此所知者皆  
為詩相稱賀翁子亦若色喜者而告余曰此吾得少展

其志之日也雖然必得子之言以行惟余固有所進於  
翁子也今夫丞之職雖若無事然所以佐守而表率其  
屬吏者其職尤重表率之道無過于廉士大夫廉潔自  
好本非分外之事但言此於今日似見為迂濶無用者  
然余輩出身為民使不稍為其迂濶者則誰當為之人  
相率而不為則斯民之受困何時已耶王蘇兩公之居  
黃皆以謫至其中有憂讒畏譏之意度不能盡發抒其  
所欲為然猶皆為民所愛慕至於久不忘孰如君之以



選擢而得此其庸可忘也

族姪華林陞平陽郡丞序

余家舊籍淄川族姓繁衍散處他郡余浪遊河北每見山東諸同姓輒訊知其俗派與之往還所見文雅雄雋之士不少其所心契而期以遠大能張吾宗者莫如今平陽郡司馬華林其人華林之先亦由淄川分居萊陽今附籍奉天推世系以叔事余余不辭而與之遊相暱如親從然也當丁卯歲

天子大比八旗之待選者而臨軒試之人持盈尺紙伏  
階墀下風掀日炙筆乾不得下人方窘促君就坐席展  
卷疾書成七言詩一章音調鏗鉤辭旨蔚茂

天子見之稱異破常格以其名付吏部選得樂陵令去  
樂陵故疲邑前政飢馘已甚君至則奮然振刷不為鉅  
筭小數每夜身從數騎巡徼盜發輒得百里間震其威名  
無犬吠警潔已奉職聽斷明允朔望釋奠學宮與士子  
講論經義以季考其業而上下其等第士益自興起於

文事遇佳客至設席談笑吟咏間作退食蕭然閉閣誦  
讀而已六年之中薦牘交上今年春遂以卓異遷平陽  
郡司馬方就道而邑人遮道留不得于是京師士大夫  
聞之莫不為樂陵惜而為平陽之百姓慶也夏四月值  
平陽四邑有地震之警

當宁聞報驚怛勘災之使朝聞夕往疆場大吏猶以不  
敏被譴諸有事地方莫不惴惴從事而夙聞君之精勤  
練達則日望其至相與共事以無貽

聖天子西顧憂君前仕粵有政聲繼治樂陵丰采益著而適當今日盤錯之任蒲州去郡城六百里而遙天幸全此一方以待君之設施也君之是行其可緩哉比者

朝廷鼓舞吏治常不次用人自郡縣拔擢不一二年而輒超藩臬督撫者有之吾之期君以遠到者此其時也然

朝廷方藉君之才以經營四方而吾徒區區欲私為一家之光寵者蓋親愛之無已也吾之序為君而作也豈

無他人不如我同姓行哉行哉吾人將執筆而書君之  
最矣

陳六謙之任安邑詩集

戊午冬予友海寧陳子六謙謁選得安邑丞以去致贈  
詩至數十篇或謂陳子才地宜得膺仕不宜沿牒為州  
縣小吏予讀諸君之詩知其所期於陳子者或不在是  
也安邑故漢淮陰侯韓信所為漢首立功地信之事為  
君子所不道然其志實有過人者方其未立功時本與

世之碌碌者無以異其始居淮陰也一市之中皆笑其怯至與趙戰背水而陣趙人皆大笑與楚戰澠水之上楚大將龍且曰吾生平知韓信為人易與耳又曰吾固知信怯也夫市中兒為怯宜也至使敵國之將聞之亦輕之而不為備然卒以此成大功則夫信之所以得此名於市中者豈一日之故哉士之志道德者固無慕於功名者也其志乎功名者非其識之沈力之堅而急於自見者往必敗而無急於人之知者必得之若信是矣

且天下之公侯將相其不為市中兒之見者幾何而汲汲焉欲其知之也不已過乎陳子抱盛才來遊於京師適當

朝廷下詔求士之日孫陽之顧一銜轡可得人方營營君棄不取曰丞吾樂也余微觀陳子本非無意於功名者今其言若是殆與營營者異趨乎則其中之所存豈可意量哉安邑故儉俗易治新令周君其同鄉又賢用陳子之才佐賢令以治易治之民政之成也可待鳴琴

之暇相與登魏豹故城蹤跡其所從夏陽以木甕甃渡  
軍處然後執是卷而歌之當必有快然自得其志於千  
載以上者此非俗人之所知而諸作者之意亦容有所  
不欲盡也則予安得以無述乎

贈翁祭酒遷少詹事序

記曰行一事而三善備者唯世子而已其齒於學之謂  
也古者大司成教世子及士以舞干戚語說命乞言皆  
大樂正授之以篇章之數然後大司成坐於東序而論



說之是凡教大學正徒授數而不論說論說者大司成也然大司成之職在論說猶不離於口耳之功先王之教世子以為口耳之功未足以成德而尊教也于是乎立之太傅少傅以養之於父子君臣之道然後可以潛移默化其志氣使之馴習於善而不自知故曰太傅審父子君臣之道以示之少傅奉世子以觀太傅之德行而審喻之此其序也又曰樂正司業父師司成司成成就德行尊為父師則必不僅主論說責效於口耳之間可

知也夫其能博喻然後能為師彼為之太傅少傅者又豈與夫樸魯少學者泛而論父子君臣之道如木偶之拜起然哉故愚以為兩傳之職非司成樂正其人莫足當之古者天子師傅多兼官況世子與考古所謂太傅者畧近今詹事之制而所謂少傅者則今少詹事之職也然則今祭酒猶古之司成乎曰古者司成得教世子後世齒胄禮廢而今之祭酒所教者僅國之俊造而已宜其與古異矣前年

皇上命東宮出閣講學

文華殿特

召歸德湯先生於江南

命以禮部尚書管詹事府事重德行也逾年蘇州翁先生亦自國子祭酒擢為少詹事先生表帥六館盡去監中夙弊所條奏諸教育法準於古制時議惜不盡用今而知

朝廷之用先生其意良厚而其職則以古司成而行少

傳之事無以異也據今之職則先生之論說方有事耳  
循古之制則審喻以太傳之德行而使湯先生之道為  
不孤者先生得無意與嗚呼自秦漢以來二帝三王之  
遺跡盡矣今

聖天子獨稽古禮文肇舉盛典擇人而畀之而先生適  
逢其會此余之所以親見之而尤幸而尤樂其與湯先  
生相與以有成也

別葉編修序

昔鮑叔既脫管仲於囚且進之桓公而以身下之其恩大矣然而管子既貴未嘗舉以為言其所言者乃在貧時與鮑叔商賈遂什一分財利與夫浮沈卑冗而卒伍廝養之事豈誠一時之感激有甚於生死而貴賤者與蓋嘗論之夫士固有蹈白刃輕千乘而不顧者矣仲雖伯佐抑其自待者重以為生死貴賤危相扶而安相攜者乃朋友之常道唯其平時知已有隱喻於形跡之外而不可以告人者此其不能以頃刻忘也故曰生我者

父母知我者鮑子也其謂我嘗為鮑叔謀事多困而鮑叔不以我為愚知時有利不利也嘗三仕三已鮑叔不以我為不肖知其不遭時也余每反復此言竊怪以管子之智計如神舉齊國而用之唯所欲為何獨暗於小事而拙於謀身至此既思得其故則又不禁歎歔以起蓋嘗讀詩綿蠻之首章曰綿蠻黃鳥止于丘隅道之云遠我勞如何飲之食之教之誨之命彼後車謂之載之此微賤勞苦而求援者之所為作也賢者失志至一飲

食之微不能自具而望給于人此其昏迷顛沛之狀必有可憐者矣然而自古豪傑之士如此者往往而有故人知我愚人得我失人愛我憎及其甚也舉目投足無一而可殆所謂行拂亂其所為者而管子之才之賢其猶不免于是歟當此之時有能飲食教誨之者幸也即不然而詆侮訕笑之隨其後甚且非意加之極之其所往人非甚堅忍鮮不喪其所守矣愚嘗以是求之古人而欲如鮑叔之于管仲者何不數數也幸而有之是可

不為之流連而三嘆已乎以予之得遇君于此也今之去也不能以無感故書管子之事以見志焉

誥贈中憲大夫沈公崇祀鄉賢詩序

先是松江府學諸生某等以故贈中憲大夫按察司副使沈公宜崇祀狀上之府太守以上于督學使者既得請遂置主卜吉迎祀之如禮于是鄉之薦紳先生及四方賢士爭為歌詩以紀其盛且以悲公之遇慶公之沒而得顯而以慰憲副公之孝思於無窮也屬某為之序



其竊按公生當前代太平之後懷璋蓄奇蘊而不揚其  
死於崇禎之十四年豈復自意其今日也歟然當公死  
時天下亦大亂矣且以漢永平播遷之後下第寒士裹  
衣牽裳之徒猶弛負擔而位郎署者四十六人唐昭宗  
天復之二年皇興初定則詔取耆宿五人與於禮部試  
者遽授之官時人謂之五老榜蓋古人于坎軻失志之  
餘其遭逢之奇又有如此者公生亂世不遇以天命也  
然古者瑣尾零落若此者蓋不勝記即其低首受書飢

寒勞苦之不恤思一發抒其胸中所聞見而及其顛踣  
不偶久之而無所成也則惓惓鬱悵以死而其魂魄之  
寄所託之陰風暄雨松柏之哀號猿猱虎豹木魅山鬼  
之所俯仰躑躅而悲嘯者又不知其幾也然而生既屯  
蹙于前沒又無聞於後者此非夫人子孫之責而誰責  
耶爰自憲副公始長即手父遺書飲泣而讀之既起家  
甲第上玉壺歷清禁持節於萬少大河之間聲譽赫濯  
猶時時痛父不置以鼎養之不及也對客則慘悽增歎

會

朝廷亦軫念賢勞不忘其所自特贈公如子官今又俎  
豆之于鄉以春秋奠侑而饗祀之然後贈公之賢與憲  
副公之孝始焜燿在人耳目矣此與側身荆棘龍鍾一  
第者其于命又孰得孰失耶或謂公孝第聞于家行誼  
著于鄉鄉之淑其德者相望也此謂合于古有功德則  
祀者歟愚謂正不必以此例也夫公非有所瑰行絕奇  
以震炫於世也但使經公之祠者見其終身阨塞而今

獲遂顯榮如此則人誰不思力善教家以得名於身後  
見憲副公之賢辛苦以列其親之名於天下則誰非人  
子又誰不思黽勉繼志期無忝於所生於以發仁人孝  
子之思彰

聖天子風勵天下之盛皆于是乎在此諸君子相為咏  
歌之志也愚不敏敬述其所以

鄒君針灸書序

古之高蹈者流若伐檀之君子稼穡狩獵以為業而詩

人美之以為不素餐此豈僅謂其能自食其力而已哉  
蓋即其堅忍之操刻苦之志以知其必能待時而有為  
以不至自廢於無用之人故曰不素餐宜也天之生人  
無論出處貴賤而皆望之以共相生養之道也如謂高  
尚其志即可放蕩流佚聽人之自生自死于天地之間  
如秦越人之相視然則亦謂之素餐而已矣予在京師  
識鄒君時稱述其尊甫聞望君蓋隱君子也予去年病  
困客言用艾可愈延醫治之鄒君從旁指穴數處時有

所駁難醫者不能違也予因叩其從來歷言隱君故讀書既自放棄則學醫尤工針灸挾此技數十年能立起沈痼實不取人一錢故術雖工而其家之貧益甚後予啓視其篋衍則手訂書針灸藥脉各二卷在焉其意以無資鉅行其書使吾父利益之道久鬱不廣求予一言以告于當世之有力者予嘗嘆後世事日趨便而古意浸微醫其一也即如靈素諸經所言針石之法必與方診藥齊緩急並用而後有效而病在腠理者尤以針石

為宜然在漢時砭石法已不傳僅得者針耳今醫家所用惟五苦六辛草木之滋味其於人也末矣而視針灸特自為一門習醫者反視為旁家外道而不之數則其為術安得不疎余故不諳醫未暇讀隱君書輒欲依太史公之傳淳于意及近世元遺山序李杲明宋景濂贈周漢卿例件繫其已試之效於卷端使人知其術之奇中如此則此書之行活人當不可數計隱君者雖隤然自廢何害哉漢郭玉有云腠理至微隨氣用巧針石之

間毫芒即乖神存於心手之際可得解而不可得言也  
輪扁之對桓公曰臣不能以傳之臣之子臣之子不能  
以之受臣鄒君本以善奕遊京師然而其于父之學也  
則固已得之於心手之際矣

跋家藏唐石蘭亭序

此石背面刻蘭亭叙二種前一面比後刻較低一字明  
嘉靖間吳門黃君者工畫人物偶得此知是唐摹石因  
贗為宋人清明上河圖并榻如舊本獻之一貴人其人



以遺分宜相後潢匠索賂不得發其事貴人以此見忤而黃亦坐是窮死其子名景星字平泉跛足知書亦善繪事與余家有連因攜其石至慈老焉此石向藏余三叔祖家叔祖沒後余尋得之春碓間石廣二尺長尺二寸厚一寸許質光潤可鑒字體多類聖教序蓋唐僧懷仁所集本也近見武塘錢孝廉梅摹帖其叔相國跋云得善本於京師前有趙文敏蕭翼辨才圖遂摹刻之余締視正與此前一面刻低一字本同而神氣去之遠矣

自後又得高麗揆文庫收藏本中有宣和御璽則文敏圖在焉玩其紙墨良是宋榻與背刻高一字本又毫髮無異只高麗本盛字上成字鈎微起而此逕帶下放字彼措此行靜字右脚低於左青而此微縮為不同及視石則三字已損即用前完本嵌補紙上補痕猶隱隱可見然後知此石之流傳真千餘年物也吾子孫當善藏之勿令俗工妄榻損其真氣康熙己巳年九月朔書於京師之停舟書屋

許君印譜序

余久聞許君默公名於士大夫間恨未接其緒論即其所為谷園印譜亦未及寓目也昔歐陽公終身惟一印記名近文董諸公書畫徧宇宙鈐尾圖章亦未見有絕勝者蓋圭璋特達無取繅藉以余之泥塗姓氏而欲附之琬琰以不朽非其宜與余嘗為新安程君穆倩鐘鼎刻說謂今人耳目當稍令近古極言俗學詆譏之為非是聞君嘗問奇於程君則所謂谷園印譜者余固不待見

而其源流之合亦不俟余之贅辭矣

己卯順天鄉試錄序

皇上以今年二月南巡狩

車駕所過惠澤旁敷尤以人才為致理根本慮有懷奇  
抱德伏處山林者必殷殷延訪及章縫秀士有挾所著  
書與詩文來獻者輒停

輦霽容受之叩其底蘊詢及素履思得真才而儲之以  
為天下國家之用意甚盛也

回鑾之後逾月適屆順天大比期禮臣列典試官名上

皇上特命

臣宸英

入貳閤事

臣

才識謏薄聞

命惶悚屏營累日竊念臣曩以布衣被薦蒙

恩食俸史館廁編纂之末者迄今垂十八年丁丑獲舉

南宮對策

闕下臣名列第七

皇上親閱

臣

卷拔置鼎甲

臣

才謝平津白首被舉凡海

內淹滯者宿聞

臣

遭際無不濯磨思奮喜遇

明時而在臣私心感激所思捐糜以圖報萬一者又當何如也茲幸得以賓興大典忝與司衡於以少副我

皇上求賢若渴之意此

臣素所蓄積特自以賦性庸拙

無年齒衰暮精力剋敝持三寸之管而器人於糊名易

書之下又安必其能拔十得五也顧臣之所礚礚自信

者惟有一誠而已

臣偕修撰臣蟠

始入鎖院即與十六

房同考官設誓神前凜以國法惕以鬼誅此臣自為諸

生時所夙夜自矢鏤心刻骨而即以質之於明神即以

是白之於我

皇上者

臣

既自盡其誠則凡

臣

心力之所未逮目力之

所未周同事諸臣必有能殫精竭思以協成一科之盛  
典蓋臣之以誠自矢而知諸臣之有不期而同然者其  
於人臣以人事君之誼一也雖然夫取人於文字之間  
安在其人之才識品量足以當天下國家之用而謂可  
以仰副

皇上求賢若渴之至意乎不知文章雖末事而用人途

轍終不外是昔人有言求之賢良方正則賢良方正即  
此人也求之孝弟力田則孝弟力田即此人也聞有能  
文而行不克副者矣若舍文而別求所以取士之法與  
舍八股而別求所以取文之方臣固知其不能又不必  
也我

皇上聖學淵宏斟酌史闡天人之微妙萃道德之精  
華菁莪雅化沾被斯人而京師首善之地人才淵數其  
沐浴于教澤也尤深故能以風簷寸晷畧盡所長使臣



等得藉手入告異稍免於罪戾者皆幸生壽考作人之  
世而然臣既臆言卷末并語諸士其尤不可不知所自  
也翰林編修臣姜宸英謹序

壽宋牧仲僉憲序

今年丁卯孟春月僉憲宋公初度其屬州司馬陳君偕  
同僚數人圖所以為壽者公固不許則相與謀曰盍走  
京師乞言於姜君乎公聞而色喜俾來請文余謝不  
敏而以公辱與文字遊且久不能辭也遂徇其請而為

之序曰世之豎功立業草野崛起之士以能自見者不  
乏而春秋以前名卿大夫都由世族至如西漢之韋平  
金張東京之黃王袁楊諸名族父子祖孫相繼秉政流  
光史冊降及魏晉南北朝尤以門第相尚宋歐陽公修  
唐書如為宰相世系表其言唐宰相才子孫數世而屢  
顯唐終世不絕迹其所以盛衰者雖在功德厚薄不在  
其子孫然而其子孫之賢乃前業之所藉以不墜豈不  
尤重哉余於唐史中獨嘉李文饒以名公子恥從白衣

舉遭際雄主文章事業卓然聳出於唐一代名臣之上而唐之社稷幾衰而復振誠所稱豪傑之士而後世鮮及者間默數

本朝相業於歸德太保宋公首頌一指公當

世祖初政用前朝舊德參預密勿天下方想望其丰采會不久拂衣大業未竟時僉憲公方年少耳風貌清整學殖該富其時見者無不相欽挹以為能為公家文饒者非是而誰未幾起家通守黃州吏事精敏居然有當

官聲及郎官比部獻決精明每奏疑獄援據律令傳以經典多從矜恕上官恒屈意從之而吏不得因緣為奸自公在事所全活以無數用是

天子異其才特命監司持節通永蓋處之三輔股肱郡以觀其所設施而將以大用之也公至則威德並敷請屬杜絕屬吏望塵逐影竦息帖服萑苻匿跡闔境大治於時公餘閑閣垂頭讀書手執鉛槧口事呻畢乘興遊覽把酒角句主客狎進清言獻酬蓋當時所謂雪園文

社者零落盡矣公獨振其頽響於簿領倥匆左支右掣之際士類且靡然從風此可謂精力之過人而文章事業兼而有之者也公春秋方富屬當令序開衙召客計爾時之分曹授簡歌九如而效三祝者方鏗耳炫目而余獨以君之濡染家學為能施於有政彷彿於古世家之風故樂從諸君之後為之誦說他日有系公於宰相之表稱為

本朝盛事者必有驗於余言也

壽冢宰陳公五十序

古之大臣佐天子出治其功績隆宇宙聲施溢古今宜無不可釋於天下之望矣而一士之不達則引以為已憂此一士者亦以為我寧抱道坎壈終身於貧賤吾心安焉彼誠賢公卿耶而不吾知吾之恥也誠知之吾之幸也故有遺棄萬鍾塵埃軒冕而獨感激於一言之知至於窮老而不悔非獨公卿之能知士而然也彼士之所以信之者其亦有素矣如此而猶有遇不遇之異者

誠係於其命焉。君子之於人也，視其人之足以知我與否耳。過不遇之說，不以存於其中也。某辛酉冬來京師，東海兩徐先生曰：盍往見澤州公乎？當今名公卿能以其學復文章於先秦兩漢之盛者，莫踰公矣。某心折焉，固願聞名於執事。然初見公聳峙山嶽，邈乎其難企也。及廁史局，日領謦欬，公覽某所為傳志而悅，後凡得某之文，輒拊掌稱善，竊垂老不自量，間隨俗為時文，尤為公所賞識。嘗置某文懷袖間，逢人必出與共讀，迴環雒

誦及其俛得復失業自委命無何每見公相對必扼腕太息輒淒然復起淪落之感而公之於某深矣公今為尚書吏部稽之於古則天官冢宰職也足以進退百僚而今自黃綬以上循階拾級吏部不能以其意為伸縮況得開口薦一士耶然而中外共以公輔之業歸公無異詞者以公不忍於一士之不達而引以為己憂真古宰之用心也昔孔子之人管仲第舉伯氏沒齒無怨一事司馬遷傳晏嬰止載其能拔越石父而晉叔向之得



為君子亦以能感於堂收器之一言則夫一士之微雖  
若無係於天下而觀古相業者必因之如之何其可忽  
也公太公封都憲公今年稱八十壽某曾為文鋪揚盛  
事而公亦於今年冬為五十初度自此黃髮台背彌成  
聖天子鴻業豈有涯哉某謹自述感恩之私以代摩絲  
吹竹而藉手侑觴於庭亦承公知己之意不敢以浮詞  
溷也詩曰神之聽之終和且平某匹士之言也邀神之  
聽意者其在是與

閻徵君六十一初度序

徒為詞章之學而已聖人之道不存焉聖人之大指在  
六經能有功於經學者是道之所重也韓退之曰每逢  
學士真儒歎息跼蹐愧生於中顏變於外不復自比於  
人以退之之才而心屈於儒者如此則經學豈易言乎  
漢承秦火諸老儒口傳壁匿斯文得以無墜是時伏生  
傳尚書年九十餘申培轅固傳詩培八十固九十餘胡  
毋生為博士傳公羊歸老於家度年亦當在八九十間

張蒼傳春秋年過百歲獨樂失其傳文帝時得魏文侯  
樂工竇公一百八十歲獻樂章即周官大司樂篇也然  
則經學之不亡者徒以諸老儒在耳天既厄之於秦而  
又以其傳分寄之於諸儒以默相而安全之使不天闕  
於危亂之世及乎真主出而文學興其所係豈微也哉

國家之興五十年矣功令非六經四子之書不以進然  
士子荒經蔑古於今為甚其陋者抱殘守缺期足應舉  
而已而一二狡者穿穴破碎聖人之微言以誑誘承學

之徒而規取厚利為名高患將不知所止獨友人太原徵君閻先生為諸生時即能脫落舉子業閉門治經亦不喜聚徒講學日抱遺經校讐傳註得失其辨古文尚書之非真所引據書出入經史百家讀人文喜指摘其利病人服其博而畏其辨卒莫能難也先生於諸經亦無不淹貫然不能拘分判度繩墨為世俗文字與世詞章之士異趨用此矻矻至老今年六十有一先是一年先生嘗為文告其所知曰先君六十生日以余母之喪

未及禪除不忍奪子之服以稱觴遂展期一年而余不  
可以無遵也適長君復申孝廉在都至是謀歸為壽徵  
文於余余特援古儒先以為先生祝謂經術之係於先  
生甚鉅其壽當遠視古人不難也余行告歸道淮陰將  
訪先生於其廬平生讀經宿疑積滯無慮數十翼少留  
相從剖決曹孟德曰老而好學者惟孤與袁伯業耳余  
竊自附斯言先生其必有以益我也

封君陳公八十壽序

前年

天子覃恩海內嘉與士大夫於是今大司農陳公得再封其太公為都御史比今年三月

制下門下士之在都者皆舉手加額稱慶而公顧若有所深念者良久曰吾蒙

恩遭際至此入侍

禁闥備承

清問出掌度支與謀

國計惟是夙夜匪懈以圖所報稱於萬一者而未得其  
方乃我親於今年七月稱八十觴矣我兄弟五人中外  
子女數十輩羅拜堂下顧吾以長子而不得奉沃盥承  
色笑於其旁也子以為我心能樂否耶某等進曰此乃  
夫子之所以為孝也經不云乎孝始於立身中於事親  
終於事君豈非以其得君而仕推其所以行已者於天  
下使無一夫不被吾君之澤而因以揚親之令名於無  
窮乎蓋仲尼之望曾子以卿大夫之孝者如此若夫屏

居子舍朝夕定省以謹修夫菽水之養是則所謂士庶人者而已以士庶人之孝孝其親夫子必不為孰謂太公而願夫子之為之乎且某側聞太公之為人也少慕漢田子泰之風磊落負濟世志初事舉子業見伯兄侍御公起家成進士慨然曰我可以無事於此矣退綜家務雖好施急病而生業日饒值明季橫流寇盜充斥乃出聚家資率親黨築土堡保聚賊往來不敢犯後遂擴其堡為小城而適當



國初叛帥反據大同聞太公名必欲招致之公則手裂其書抵其禮幣於地賊怒益師來攻登陴固守數十日得救圍解一村數千家不終陷于不義者太公一人之力也此與田子泰之堅辭袁氏辟命聚衆徐無山中盟誓約束歸命中朝者何異及乎功成身完褐衣蔬食自溷閭井則子泰之不欲賣盧龍以易賞祿之義也然太公濟物之志常存胸臆雖老矣猶疊疊論天下事利病不休既夫子連舉進士官中秘受

兩朝不次之遇復慨然曰吾果可以無事於此矣遂推  
機息憊於十畝之間訓課子弟務為明理達用期以所  
學上報君父而甲子之役次公某登賢書諸象賢復蒸  
蒸起矣

聖天子嗣大歷服無疆惟休亦惟是一二者考曰篤不  
忘在昔唐楊於陵僕射入覲其子嗣復方知貢舉率兩  
榜門生郊迎宴新昌里第嗣復引門生列兩序元白諸  
名士俱在坐賦詩以為榮異時夫子翊贊元化躋世仁

壽而太公安車至止膺憲乞之典某等門下士二百人  
次第上壽卽中意必有如元白其人者倡為歌詩播之  
樂府斯乃太平之嘉瑞

國家之盛事非獨稱艷於一時一家已也司農公於是  
欣然而笑曰有是哉是吾父之所願聞也遂命書其辭  
以歸而侑觴焉

大司農陳公壽讌序

甲戌春大司農員缺

天子以度支重任非得有學識持重大臣付之不可時  
澤州陳公讀禮家居三年矣先是公嘗長是部及吏部  
以應陞姓名疏聞

天子持司農印特造六里中付之有司敦趣上道公至  
陞見

天顏歡霽慰問寵渥中朝士大夫皆慶君臣相得之盛  
而知

上之所以倚毗公者未有涯也公既蒞任一年釐剔夙

弊告誡司屬以約束吏胥舉天下會稽之錄中外出納之數繩貫絲聯一一時其盈縮而次第布之然其大意無非仰體

聖天子恭儉慈惠之德務以省費節用藏富於民而為國家千萬年根本之計蓋周禮天官冢宰所與其屬日成月要歲會以周知四國之治者正古者宰相之職掌故自漢以來居是官者咸謂之計相而

本朝以是入政府者亦多有其人公以老成寬大再居

厥職

天子賴之十四司拱手受成庶績咸理皆感公之賜而不知所以報也于是季冬下浣值公初度辰相與謀舉觴稱祝階下又謂不可無文以先之也以余為知公深者則羣請致一辭焉余謂諸君子曰公等以今日之獲庇於司農公為德也亦知公平時學問陶鎔涵養所以發輝光大而見之於事業者乎公自志學即以聖賢自期得心法於其鄉薛文清公讀書錄比通籍受知

兩朝官

禁近凡入講幄開陳王道據斥異端詳端竟委必期積  
誠感格而後止一總憲綱五長部曹諸所條列動著功  
令即意所不可侃侃持論絕不為利害小有顧却蓋其  
歷官事業卓有根本者如此至其所著尊聞集詩重風  
骨文尚體要惟其涵茹古今而出之粹然一稟於正有  
古人所不得與者故一時知者不敢以文人目之而皆  
以為有德之言也今

上春秋鼎盛公以魁壘耆碩託寄心膂行將待公從容  
論道輔致太平而不復煩以政事余幸得廁同列庶幾  
備聞緒論不致隕越是懼則今日之拱手受成為諸君  
子之幸者余又竊以自幸也已爰是不辭而為之序

李少司空壽序

初今年仲春

大駕將征漠北既諏日類告乃遣才望重臣分行天下  
祭告嶽瀆及前代帝王陵寢于是今少司空昭陽李公



奉南嶽之

命以往甫逾月四月上旬為公五十初度其門下士仕  
于

朝者皆謂公體

聖天子重神至意必能恪恭齋祓妥厥祀事受胙獲福  
于神之靈惟是朱陵之臺赤帝攸館金簡玉文神禹所  
受數千年以及

本朝威命遐暢盛德洪敷

皇上親駕六龍於大漠之庭颺馳霆擊維嶽之神必將  
奔走趨命之不暇其去來風雨享祀飲食既醉既飽所  
以保翼我

皇躬而蕩滌羣氛奠安區夏者及今凱旋之日盼蠻既  
著矣先是公未至衡時湖海間旱魃為虐禾未下種千  
里若焦農夫釋耒以唏守令蒿目坐嘆公下車蒞祀祝  
冊昭告甫畢陰雲來湊水氣上騰曾不崇朝布濩徧野  
蠻氓歡舞合辭同聲以告於守土大臣謂

聖天子明德惟馨幽明協應而公之精虔孚感亦宜受  
祐于天督撫具疏其事旋蒙

溫旨識者已知寇不足平矣比公還道過維揚拜太夫  
人於庭下被綸翟之華奉鼎烹之養親族歡飲上壽閭  
里瞻嘆以今月吉日入都門適當

回鑾飲至之時而公以祀事有成復

命拜

賜喜可知也公家累世台司當前朝穆宗初年文定公

金匱要略卷二  
實首揆席與新鄭同心合謀決封貢之策百年狂獬帖  
首受縻從此邊烽永息中國享無事之福者五十年洎  
謝事歸里入子舍修溫清禮猶黑頭宰相也東南至今  
傳為盛事公胚胎家學器宇宏碩由侍從參機禁裏贊  
良多轉佐冬官聲望彌起是役也師武臣迪果毅侍從  
者執鞭弭公亦以明禋奉使翌成大功祖孫遭際前後  
同轍時議謂

上眷注方殷不久當以鈞軸相處一如文定當年詩江

漢不云乎虎拜稽首對揚王休作召公考天子萬壽蓋  
賢臣能開敏其先世大功則天子且敬舉萬年之觴其  
身受多祉無疑也某誼託譜末值公歸舉壽讌而待余  
一言以侑搏也因即公今日使事而推本其先烈并敷  
揚

國家盛美使奏之賓筵比于聲歌殆不止為公一家之  
慶云爾

京兆吳公壽序

國家設翰林院以儲公輔之選其期之甚重而待之甚優每三年一選士教習之然至三年散館之際則例有所去留以出為臺省郎官者相望也至及第三人則無所致問常優游侍從之班不十餘年而踐台鼎斷國是矣然從容養資不經世務論者或以為屈于實用故前朝建議屢有內外互調之說

本朝順治間遂遴揀才望出補方面其弊也一出而不復入而向之以才望稱者且沈淪州郡不免有積薪之

嘆矣我

皇上銳精圖治尤加意儒臣三十一年

親擇官僚十人改任京朝官使之練習故事親職理政  
至有所

游幸及賜宴賦詩則十人者常珥筆扈從均禮如初蓋  
使人各盡其實用而不至有內外升沈之感至良法也  
是時語水匪菴吳公以司業得通叅旋擢京兆丞京兆  
號為天下繁劇丞之職于是無所不領居是官者多自

貴重不事事以為常公獨親攬簿書一切案牘以時行  
下民間訟牒至庭即與斷理一一慰遣之民皆得願以  
去而吏竦畏之若神畿輔學校丞專掌也每試鏢門圍  
棘請謁無所通用經衍程課而考之以行誼振幽發錮  
才雋畢達自其前為司成時已然所採錄四方名下士  
無數相繼登鄉榜取高第去一時負奇抱偉之士無不  
稱述詩書砥礪名教號為吳公弟子也于時九月上旬  
值公五十初度辰相與約為詞以祝而問言于余余唯



古之為大臣者必魁壘者艾碩儒公當登第日既以學業聞望推重海內今雖年力強壯容貌豐偉不異於往年而士大夫中相與推老成宿望已無不歸重于公矣以

天子素所眷注之從臣貫串古今通達治體又試之以繁劇之任所處無不當而滋謂其可以大用也經曰五十曰艾服官政又曰五十而爵蓋天下引領以望公之設施也久矣而章甫縫掖之秀罄折序立階下捧觴以

為公壽考之祈者豈獨其私心之愛慕已哉無亦仰體  
聖天子企望之殷而欲以其身及見明良之際遇意甚  
盛也余承乏政府自愧報稱無路唯是以人事君之誼  
不敢有忘喜公之道之將大啓而其年適及乎此時也  
故不辭諸君子之請而為之序

郡侯張公壽序

壽之有文起于近世以為養老而設然余觀詩書所載  
其君臣上下之間動以壽考相期有不待其年之已及

而始致其頌禱之意者蓋其風俗之淳厚忠愛纏結於心而形于語言言之不足又為辭以文之固其宜也今年春郡大夫張公初度吾邑侯方侯偕其五邑之僚屬請余文以祝之侯見余文而嘆賞以為有當于古之作者而惜世人之不盡知因為座客歷指文章離合反正起伏轉換映帶之法洞中肯綮以是知其究心斯事者已久其能以文章為政事而使吾邑之人民被其德澤而沾其教化者豈偶然侯春秋尚未及彊仕今三月日

為其懸弧矢之辰邑之父老喜而交祝以壽考者一如  
古詩書所稱而又謂不可無以文之也遂以屬余維侯  
所生里乃朱蔡諸先生講學地侯與其尊甫沛令某公  
同舉于鄉比謁選而南纔下車問民疾苦雨潤日暄一  
當聽斷雷電交發官署肅清罔干以私以故邑比歲不  
登至是大稔民咸以為公德余嘗慨前朝士大夫之議  
論苦守令者一拘于資格而才傑之士無所得奮其用  
今世則不然吏道雜而多端邑令長間得一經明行修

之士民望之不啻景慶而其人又有不同者詩丘中有  
麻曰彼留子嗟言其居下親民所在見理也繼之曰彼  
留子國美其子本於其父也史稱傳琰父子為令並著  
奇績時謂其家有理縣譜彼果何術以致此哉無過於  
以經學相傳授而已漢尹賞誡子以吏殘賊見廢後思  
必復用薛宣過子彭城令署不教誡以吏職且謂吏能  
不可學此直佐史故習非儒者所貴公既生長理學之  
鄉其家庭討論而饜飫於仁義道德之旨者匪朝伊夕

矣以是小試之於一邑其為吾民之幸宜有過于單門  
倔起聞見淺狹者萬萬也余聞之長老往吾邑有治縣  
去而為公卿于朝者宦成里居其縣之百姓相要饋問  
於其家歷年不絕也吾邑風俗淳厚待公之施澤既久  
敬歷中朝鬱為耆碩他日黃華白鶴之間有扶攜而羅  
拜於堂下者必吾慈之人也請以今日徵之已

黃昆瞻先生壽序

予從事兩館間行十年所得交編修硯之黃先生相與

商畧舊聞多所剏獲其為人年少靜氣不以才地自矜  
炫獨其心所嚮往乃在古忠孝廉節之行講學取友之  
事故以余之衰老失業人所厭棄而君獨能睚就之如  
素交今年春余奉

命同總裁東海公還南纂修一統志有同館挽其請行  
者編修私謂余曰吾亦亟思歸耳顧吾父遠宦塞外吾  
在此息耗日聞衣食什物所須續往不匱是我處京師  
猶膝下也吾不可以復南言訖凄然若不勝孺慕之色

余益心服其純孝既問之廣平公蒞官行已甚詳則以  
為編修君之賢其得之家學者有素余于是復思從廣  
寧公游而不可得編修曰吾父以今年十一月下旬稱  
六十觴矣公盍以文序吾父生平畧道吾所不得侍養  
之意而致君相慕之誠其可也余唯唯蓋公自戊戌通  
籍歷今三十年矣初節推劇郡壯年銳意辦職沈寃滯  
獄一訊立遣人以其間代守令教養之具聲譽卓然自  
許功名可立致已緣他郡案牽連鐫級他郡守即公鄉



試舉主也是時上官多勸公辨復者公義不以一官易  
所天之誼從此淪落浮沈幕僚所經黔筑萬里蠻烟獠  
瘴殆非人境已而南下洞庭東驚遼海計人間危險地  
已身歷其大半然所守不渝一令所至動必奏績今在  
遼數年日以邊邑蕭條居人愁困欲稍為經理之然未  
盡得展布所蒿目撫心見之歌詩者識者比之元道州  
春陵之咏皆知其有憂天下之志矣公宿儒舊望人譽  
所歸列卿臺省舉足可到方今賢公卿滿廷必有起而

為公任斯事者父子接武中朝流光史冊誠甚盛事或謂公懷遂初之志久矣太邱一長公卿再世即江夏父子間名位相懸亦公家故事德高位絀于道何損意者行公之志而杖策歸里闔門私第擷商山之紫芝飲南陽之菊水噓吸沖和頤神養性從容以待

聖天子蒲輪之召可乎編修君其亟持吾言以往必有以博公之開口而一笑也

大司寇徐健菴先生壽讌序

戊辰冬十一月大司寇東海徐公初度之辰其南宮所得士居翰林者三十有七人共謀所以稱觴者於予且曰公所好者子之文也子無固辭雖然夫公之知余則豈徒以其文之謂哉盍即余所知於公者言之余識公二十餘年矣當其為孝廉時即毅然以身任天下之重自後洊登高第踐歷三事所經涉事變益熟而胸中所貯書益多其入而以孝弟仁義淑其身也如嗜慾之惟恐不得所求其出而宏獎人倫扶植善類也如飲食疾

疾之在已其作而謀天下之事也上求可信于君而下求無不可告于人此余知公立身之大端也及其游覽百氏根據六義而發之文章則必其實可以立誠居業救弊起偏而不為一切譎詭浮漫無當之說所惑此余所以知公立言之大端也然又有余所深知而世之所號為知公者或未盡焉則以公之于是其心實有所歎然而未足者也公自遭際分直

內廷綜理部務在公少暇日暮歸第坐客請問以數十

輩論文晰疑酬酢盡意乃止則精力利弊對食欠伸微視兩髻垂垂白矣然日以為常不厭也今年春自惟直道忤時拜疏求退

天子念其誠款

詔許解職總裁諸館事留直如故公于是閉閣謝客日取周張二程先生及朱子遺書熟讀而精思之俟其反復推尋融釋脫落而久之乃得其所為灑然者比余再三訪之則見其氣益加靜而貌加粹體加充矣記曰君

子莊敬曰強明道曰人不學則老而衰君子之所謂強者乃在道德之充盈而不在乎氣血之壯盛也君子之所謂衰者乃在不殖而將落而不在于年齒之逾邁也夫文章小道也功業外至也朱子曰人常有以自樂則用舍行藏之間隨所遇而安之此公向之所歎然而不自足者余今乃自信其知之獨深也今

朝廷勤求化理方待公以鈞軸之任而公亦宜不得懷道匿德悲然自釋于天下之重然古之君子身處巖廊

之上而其心浩然與天地萬物者游彼誠不以富貴移其心也循公之志或者功成于未老之日退而倡明斯道辨統緒之毫釐晰微顯之一致其深造也必窮理盡性以至於命而後命自我立其兼成也必理學與事功相配而後體用不至于偏則予請從諸君子之後勉而卒業焉斯為之壽不亦大乎請即以此言進之

定海薛五玉四十壽序

有士於此不役役于聲利不雷同于世之是非取舍恬

澹寡欲而遊于世斯可以交與予固非此弗以友也而少聞薛君之名已而東至海上以陰求其所謂恬澹寡欲不役役于聲利不雷同於是非取舍者既於數十百人之中得其所願交而如恐不得交者茲於薛君遇之焉聞君少時倜儻善議論所至傾一坐中與之登山而臨水雖終日極困不厭意必慷慨自喜之士而惜乎余未之見也蓋君今年乙未冬已四十矣或曰君少不得意於有司今適合古強而仕之時雖不遇未晚也予竊



以為不然夫古者八歲出就外傳至十五則凡民間之  
俊秀皆入庠序王公卿大夫士之適子皆入國學教之  
窮理正心以修乎身推之於天下國家將無所不備焉  
既乃升于太學爵命之蓋其時日之講貫服習章程之  
精細詳密有不待二十五年矣四十而仕者極之中人  
以下也孔子弟子列傳載樊須公西赤年皆極少及孔  
子時仕度其年皆不滿四十又非必顏淵子奇而後然  
即令如是士之有才而無命泯滅者不可勝記矣數年

間天下競於兵爭災祲疾疫盜賊之患日夜不絕而民之轉死相望矣此宜仁人君子之惻怛於心席不暇煖救之猶恐不及而君子以無事而至四十豈不可惜與使君之堅其才老其識恬澹寡欲以集事其為世利益滋甚而予之為是言者亦欲使世之知有薛子者惜其少年英銳之氣無使英雄有遇不及時之嘆乘其及今強壯之可用而使天下少享仁人君子數十年之利則凡余所願交而如恐不得之人無事以至於四十者其

亦庶乎其鮮矣

馮宗一壽序

余家縣東巷與馮氏隔水居世相好也自余舞象執經於馮先生之門先生有子曰孟勉曰宗一孟勉與余同庚生幼同學長益相善當甲申乙酉之際經涉橫流拋荒舊業而余與孟勉從播遷之餘終日抵掌談縱橫王霸之畧無復當世意又以其間商確經史旁及詩賦每侵晨出外舍一榻坐對至夜分始各歸寢明則復然如

此者僅十載已而兩家生事漸促余先出遊孟勉繼之  
三十年中計聚首時或隔歲不得一見見輒復別去及  
余旅寓京師孟勉辭余為廣德之行未幾而元伯見夢  
生歿異路矣其後宗一數數至京師未嘗不過余余對  
之便執手於邑常嘆以馮先生之盛德宜有後而孟勉  
所就止此疑天道幾不可問又私意謂宗一渟蓄深厚  
意先生之鍾報將在於是今年余歸里其仲子進謁跪  
而有請問其所以則宗一已於今年壬申春壽開六十

矣曰吾父方客濟上吾兄弟曠焉定省庶幾齋先生之  
文往而介壽于前一開老人之懷抱余謂宗一神氣充  
實志畧方壯出其緒餘足以完父兄未竟之業今僅年  
杖國似不足為侈者然余所以不辭其請者既悲孟勉  
之不幸又喜宗一之足以幹家于是言之不足又深致  
其祝辭以將之者蓋兩家世好之情親愛之誼有不容  
已者也

侍讀徐公嵇夫人雙壽序代

前年癸酉初冬為吳興侍讀徐公七十初度時公元配  
嵇夫人年六十餘華髮相莊宮諭君偕其令嗣暨諸孫  
鞠脆上壽禮成燕飲雍穆之風縉紳稱嘆未幾公謀拂  
衣歸山夫人亦以有子侍從足以上報

國恩願偕遂鹿門之隱相與棹舟而還疏池藝圃徜徉  
杖履蒼雪之間多古高人奇蹟稚川丹竈桑亭茶經王  
右軍陸魯望之徒所觴咏而嘆張志和之所浮家泛宅  
而游者公藍輿至止未嘗不流連日夕及入而與夫人

相對則欣然遂忘其貧以時與子弟坐家塾誦說經史  
道先賢故老舊事夫人則抱孫含飴分燈課織其旁若  
無軒冕之在身而祿翟之耀體者其視世之奔逐勢利  
剝精神勞苦而不知止者何如也今年孟夏夫人始壽  
開七十同鄉親串莫不嘖嘖夫人之賢而見侍讀公之  
以老成碩德與之偕享五福之盛則又爭慨慕之不已  
會宮諭君以遠在京師令嗣任可在家稱祝請予一言  
將郵致之以侑觴蓋予聞夫人為名孝廉女素嫻姆訓

自盟饋以往侍奉周旋動循禮則某太夫人病困夫人  
調侍湯劑至兩月不解帶以是妯娌化之一堂聚順迹  
其間教古列女不能過也而其佐侍讀公以成名尤為  
世所難能者公少貧績學名重士林所締交皆海內才  
雋中更憂患家道轉落然席門窮巷戶屨常滿負笈請  
業者所至成市夫人悉庇具修潔黽勉有無以應之而  
公不知也壬癸間公既連取高第列從臣矣夫人彌自  
謙抑自中外親黨以及村姬黿婦待之各盡禮意絕不



見其貴倨之色所與公相鷄鳴交誠者惟是夙夜在公之誼為惓惓故公在史館凡所撰述進呈

天子見之無不稱善所造就成均學者及京兆大比所得士皆矩步詳雅學有家法望而知其為南州弟子侍讀公之樹立偉矣抑亦夫人相助之力居多也自公之歸今三年宮諭君聲望益隆

宸眷優渥將以大展公生平未竟之業而君顧思戀庭幃南望於邑本欲因介壽之期歸而承歡于其側也夫

人則寓書教戒當

國家多事之際臣子驅馳効力正在此時慎勿以吾兩  
老人為念余與公先後同官氣誼最篤兩舍弟又與公  
家稱同年兄弟交在紀羣間故每見宮諭君必舉公家  
庭所教戒者以解其離憂而釋其獨勞之感又為述所  
聞於其鄉人者備頌美之辭致之賓筵以為難老之祝  
今

主上倚宮諭君甚厚顧惟舊德必復致公左右潤色鴻

業而夫人亦將起居六宮為命婦班行之首此時再奉  
養京師從容上壽吾知士大夫觀感興嘆者必益倍于  
公七十時而宮諭君又何必眷眷於白雲之慕乎遂次  
第其語為壽讌序

錢太君七十壽序

鄞邑東南有地曰甲村其山由四明發脉迤邐東下迴  
抱前後水自金城分派兩流滙合而王氏聚族其間千  
餘家其有學業至性人也寓京常過予言吾宗望出太

原自宋南渡至今詩禮之傳不替不獨其子孫濟美亦  
代有賢婦人焉高祖總憲定齋公為正嘉名臣其母金  
太淑人身教至嚴所遺詩文蘭莊集數卷皆班誡七篇  
之類也吾子孫世守之先君遭亂棄舉業不治生計蕭  
條吾母錢太孺人蓄旨代匱室無交謫先君以是益忘  
其貧不幸中年捐館愚兄弟三人尚幼也吾母弱婦搢  
門足不踰閭限內外整整挾策課子帥以禮訓其兄弟  
粗識文義以不自墮於昏愚不得罪于鄉黨朋友者惟

吾母之教是賴某今恭遇新令幸邀安人

封誥上榮膝下將藉此以進稱七十之觴顧非得先生  
一言不足為鄉閭光寵予聞而善之謂太君之賢可無  
愧于蘭莊之風也自惟浪遊多載今老矣家鄉名勝屐  
齒多所未到明春決計請告冀以殘年徧遊浙竒山水  
先取道金峨雪竇杖策四明二百八十峯中訪其所謂  
過雲石窗之勝出而舣棹甲村拜壽母于堂就君信宿  
談話桑麻周行阡陌太夫人其必能減茅容之饌以食

我也

張母何太夫人壽讌序

代

蒸民之詩尹吉甫之所以頌仲山甫也其第四章曰夙夜匪懈以事一人明乎山甫之生保茲天子也然孔子作孝經至引之以明卿大夫之孝何哉予以是知山甫之為忠臣抑以其孝子也蓋卿大夫之孝非必其晨脩夕膳之是急也如詩所謂王躬是保出納王命敷政四方似與門內之行無涉然必如此乃稱所謂夙夜匪懈

者而忠孝之道盡是矣今年八月某日為今京江相國  
母何太夫人八十誕辰太夫人時在里相國既喜其親  
享無疆之壽又以身不得歸而洗腆于其側也則屬其  
數人者各為一言以叙已所以在公而不得即歸之意  
因而稱述太夫人之德以資賓筵之一笑亦庶幾乎詩  
人之義也太夫人之始嬪吏部公儒素耳黽勉有無不  
自言瘁既而吏部公冠冕南國游登上第文章聲價翕  
然增重海內則皆太夫燈火佐讀之餘也及乎內總銓

司裁量人物外持文柄樂育人才遂以治行徵為天下  
第一

朝命方新遽返初服此則吏部公之高風曠致而太夫  
人能贊成之且又為之潔庭除庀肴醴相與從容舉案  
有終焉之志是時長公編修君已對策

大廷魁天下矣相國與祠曹民部弟兄先後起家甲科  
今諸孫天門復捷南宮選入中秘詩書之澤相望也自  
吏部公歿後幾十年而門戶鼎盛日甚于曩時此孰非



太夫人內德之所成就也者而一不自矜每見有所遷陟彌加抑損勗子孫以無忘先公之遺誠相國偕其兩弟謹守家訓清白自將用以上當

帝心綏和有夏則今日海宇之羣帡幪于相國變理之德者又何一非太夫人之賜也耶太夫人雖壽八秩筋力不啻如盛年時嘗綵輿畫舫就養南北間屬今初度之辰三黨姻親雜沓上壽里閭子弟踵門稱慶而京師縉紳及四方知名士亦無不躡相國之階效華封之祝

者吾聞之昔三代之盛鄉飲酒禮燕禮皆堂上鼓瑟歌  
鹿鳴四牡皇皇者華是為工歌三終明君臣之相得也  
既歌而笙奏南陔白華華黍是為笙入三終見家庭之  
和樂也外盡君臣之誼內洽家庭之歡所謂夙夜匪懈  
以事一人為卿大夫之孝者于今日張氏之堂見之矣  
今

聖天子方孝養

長信宮盡愛盡敬德教洋溢而相國適當此時亦得致

其不匱之意於所生雖其隔在數千里之外其與朝問膳而夕視寢者何以異也余不敏備官卿貳幸從稱觴之末而樂觀其盛是為序

送姚子南歸為其母夫人壽序

今

國家定制仕宦無兄弟者得歸終養而凡仕于京朝之官歷俸六年例得請告歸省此制初不見于三代之世蓋三代仕者舉不出父母之邦苟非行役在外則朝溫

而暮清日可無廢故終養之典不著然其君之所以體恤乎下下之所以仰望乎上者猶惟以將父將母為惓惓一不得則君懼無以使臣而臣亦不免哀怨以思以懼其不能盡心于所職如北山之歌陟岵之感是已況于後世背離膝下踰越數千里以事君而東西南北之唯所命夫至是而不思所以審處而曲慰之者有國家者之過也至于例許得歸而不歸吾未知其何說矣余在京師久所見公卿間多以官為家其位益峻祿益厚

則決去益難有未葬不除服數十年而襲紫衣朱自若也蓋縉紳之清議不立久矣大臣如此則下何觀焉以故風俗日偷而

盛朝光明駿偉之烈不炳耀于世甚非所以稱

聖天子以孝治天下之意一日友人姚子歷初過余辭行問其奚往姚子曰吾母以明年正月屆七十壽行歸省欲得子文以佐觴耳余曰今仕宦于京朝者絕不聞以母子相依為人生可樂事子以嬖客思親急裝出國

門意不返顧天下名教獨身任之固當既又曰夫子之親亦幸子之不為士大夫耳不然子亦且如諸公者以身許國之不暇雖欲返歸衡茅烹鷄炊黍召會鄰里上壽於老人之側得哉子姑行矣勉之然姚子積時求養於外一旦以親故垂索而還不以介諸懷其志趣過人甚遠使異時得遂其祿養意其樹立必不出古人下風俗之變而清議之立吾不于姚子有厚望乎姚子尊甫文學公為先君執友余垂髫數過其塾太夫人輒飲食

余視余如親子弟以故論知其閭德甚詳既稱未亡人治家內外整整收祀參議府君而上失祔之主數世疏數有序魚菽之薦必潔以誠其大者如是則其他所及以貽為歷初兄弟無疆之休者可知矣余客居無狀先太孺人厚終之事忽忽未舉者有年每拊膺旁皇中夜不知所出而樂稱姚氏母子之間如此者豈敢以望於人亦因以志吾之愧而已

送中學憲赴任過里為茅太夫人壽序

今僉憲申君任禮部郎至京未久也太夫人在里春秋高矣每思念不置會粵西督學使缺

廷議擇可者乃越次以授君君一不自喜而以益遠太夫人有愀然之色又念是役也當過家省覲而行適值某月之初太夫人八十初度則求于能言之士為詩文進之以冀太夫人之一笑也以慰其離憂之思而請某為之序愚維古之君子其未仕也有為養以求仕者矣及其既仕也有以不得遂其養為憂者矣故方其憂不



及養則惟恐其仕之不早及其羈絆于王事馳驅於道路而汲汲然憂不得遂其養之志則其視一官之為累也又惟恐其去之不速此二者皆過也夫親之不可以無養固也若夫仕不仕天也而豈吾之所可預必其間者哉惟有道者不然時不吾與蓬蓽而行粟水而奉非儉也時已過矣道已行矣而內顧吾私有不可以無遂者則資于事父鞠躬盡瘁而初亦無害于吾之為孝蓋事親誠則能使親忘其貧事君忠則能使親之不樂私

其子使親忘其貧者士庶人之孝也并能使親之不樂私其子者此可謂卿大夫之孝也此古之君子所以推心任運無入而不自得者也曾何有于二者之足患乎吾聞太夫人故吳興副使鹿門公孫女及歸為相國文定公諸孫婦佐先大夫成名而以盛德稱中外閭閻者數十年彼其於君臣父子之義講之有素則于僉憲君之是行必有欣然願其去而樂其志之得行者也君以此思之宜其中亦無不可灑然者粵西當用兵之餘

王化再沾人文日起計僉憲君報政在三年大比之後復取道里門北上而是時太夫人方健飯于是隨計偕諸生執經逡巡磬折階下後先而上壽亦人事之可喜者也僉憲君益可無憾于是行

王母申太孺人壽序

康熙二十五年蘇州府縣學諸生以王母申太孺人守節狀請旌自縣以次達之撫院旋以事聞奉

旨給銀建坊如制鄉里莫不謂榮再歷年而太孺人春

秋稱六十矣于時嗣子東發方以才選載筆史館暫假歸省其同年生二十九人謀所以稱觴者以余之同事館局且知其兩家世澤甚詳遂請一言附東發之行而往壽焉余觀太孺人之苦節及東發之能以才顯揚其親使卒有聞于載述而益嘆文恪公之遺德遠也當明宏正之際八奄亂政大臣相繼斥逐宗社阽危公甫入政府苦心調劑嘗論逆黨以士大夫之可殺不可辱所保全善類為多然終于不合潔身遠遁當時大臣之能

明于去就不罹清議者惟公一人而已其自贊曰貴戚  
赫奕不能附麗權璫狂狷不能嬖阿一有違言超然不  
辱蓋實錄也自後子孫承藉先德咸能以名節自砥至  
於閨門肅穆家法之嚴整尤為吳門士大夫家稱首若  
太孺人之艱難守死其尤著者也太夫人曾王父曰文  
定公事在國史植根華閥夙嫻姆教嬪于先府君織絰  
佐讀宛然寒素也甫年二十四而遭變時即欲以身殉  
姑涕泣曰吾不忍見婦與子一時畢命即如此藐諸孤

將誰託太孺人感之勉進飲食既而朝夕所以奉養其姑者益虔無懈歿而殮送之如禮時節薦享之必竭其誠宗戚內外皆以先府君為未亡而喜見東發之成立者至叩其學問蓄積又以為非得嚴父之教何以至此蓋太孺人之于王氏始終稱無負矣今聞其女嫁松陵沈氏者亦早失所天勵節如母氏以此服太孺人之身教不獨能成就其孤而且有以化其女子蓋文恪公之流風遺澤遠矣彼其沾溉於數世者如此其盛此所係

于人心世道非獨修為一家之僅事而已也余聞之禮  
云寡婦之子非有見焉則勿與友此非以戒其友蓋所  
以深責備于其子者也非有見焉則勿友矣苟有見焉  
斯友之矣東發少遊京師發聲太學最久服官祿養為  
二十九人者譽之無異辭且欲自同猶子以介壽於賢  
母之側惟恐不得其歡心此其家庭朋友之間皆有可  
重者也余故樂敘其事而傳之

贈董子為其母夫人壽序

往年晤董子吳仲湖上時余未識董子董子亦不余識也接其容藹乎其可親與之坐久之雖儔人廣衆之中有以知其為董子無疑也董子尊君孝廉公母范孺人皆長余兩大人年三四歲兄弟四人皆讀書修行足繼其家聲每家庭侍寢膳議論古今事成敗雜以鄉閭耆舊事迹可傳述者輒人出一見持不能決請之尊先生然後得定其一家師友自足娛樂如此而余兄弟三人無他技能足以稱家大人旨又時時扁舟逆旅動輒數年



或遠間三四千里外一遇佳節時至衆歡獨酌之際則對食悲愁以思雖居者亦泣然不知其為樂也以此不及君兄弟遠甚然董子之言曰菽水吾大人所甘也吾力尚不能具今人間言養親者則曰孝在志養奚必甘旨哉是竊取好名自予而極其志至於以天下儉其親不顧也吾不忍為之故與其兄三人日夜攻苦不絕庶幾少得所欲則築廬于山水之濱具車輿几杖弋于野而釣于淵奉我親以老焉吾豈有求于彼哉而其志適

有與予類者今年秋為其太夫人五十初度問予一言  
為壽予謝不敏而贈董子以言使其歸即為予跪進之  
可也

顏母朱太宜人壽讌序

唐李文公翱自稱其序高愍女楊烈婦為不在班孟堅  
蔡伯喈下其言以遷固敘述之工故讀者詳而事迹愈  
著而嘆後作者之不盡然此固然矣余以為古忠臣烈  
婦之不欺其志義炳日月雖其文之不工于傳無害况

其原無待于傳耶惟其勢窮運極瀕于阨危矣乃事會之逢適有天幸名完而身亦不虧以至富貴顯榮享有壽考此豈非人生之至願而古所稱吉祥善事者耶則雖其心之無待于傳而因事咏歌頌述之以風厲于天下宜其聞而興起之者多矣余自少聞客談闕里顏太宜人壬午殉節事至烈私謂所嘗見古所傳烈女間有其人晚近世決無此事然貯之胸中已三十餘年今居京師與編修考功兩君遊始知兩君皆太宜人所生而

與奉直公所親教督而長成之者蓋太宜人今年已屈七十壽余向所疑古烈女傳僅有其人者今果得親見之謂古今人何遽不相及人見其富貴顯榮壽考為天之報施善人而嘆古人之身名俱泰所謂吉祥善事如此類者何不數數見又疑今人遭際遠勝于古也蓋太宜人為故奉國將軍某公愛女以天潢貴胄作嬪于奉直公大賢世裔嫻于禮教者素矣方其出與奉直公同難也倉卒被驅邈卒詈不絕口卒擊折其左臂將加刃

馬散髮披頸不殊僵踣道左積日始甦以指自刺指強  
不得入則取隣女所攜刀自頸人不入時沍寒夢神人蒙  
以絮而明日小婢來伏其旁呼之忽醒有遺奉直公以  
金創藥者傳之得無恙夫節義之報不疾而速如此此  
所以更三四十年後綿慶延祉益繩繩未艾蓋有神相  
之者然也今

朝廷恩數重疊自初封孺人累三封至太宜人京師士  
大夫多編修考功及季子孝廉年家故舊稱詩上壽以

百數余愧不文無能敷揚盛蹟勒金石而播管絃也異時太宜人年益高

國家太平益愈久歲時置酒高會戚里抱曾元膝上絮述年少亂離百死一生之狀歷歷如在目前于是相傳為承平世家盛事必有班蔡之倫載筆而紀其烈如李文公所云者矣當是時也殆亦有徵于余言也歟

徐母李孺人壽序

今年辛酉夏為徐子亦沆元配李孺人五十初度孺人

父某公于吾母為中表其祖大理公之館甥于吾外家  
孫氏也與先君子為忘分交孺人之母葉也娶居苦節  
嘗隨其姑歸迎車廐里第與吾母居止情意甚款時孺  
人纔數歲然已能盥櫛衿纓隨母定省姆傳授內則女  
誡畧能上口舉止如成人矣後歸亦沆吾母嘗嘆曰徐  
氏有婦矣以大理公之盛德而無後天其或者鍾報于  
是女耶當是時吾鄉承兵燹後巨宗勢族日就零替大  
理公之舊業已不可問即亦沆先人侍御公瓢笠入山

溷迹緇衲亦沆窳身荆棘中數從其尊甫風餐雨宿暇  
則膏筒鉛槧摘次呻吟不問家人產孺人于時孑然季  
女也措拄中外租籍市券手籌筆疏各有條理上恤姻  
黨下撫婢僕恩意周到無不人厭其心以故亦沆得一  
意學殖名譽日起又能以其餘力佐夫子課三嗣君咸  
立今皆補學宮子弟籍有聲矣向微夫人則亦沆之艱  
難固當百倍意天之憫李氏而鍾之報者適所以為徐  
氏之福耶今春予寓郡二子澤泳謁余而請曰吾母天



性孝友念外大父母蒸嘗遠隔則設像于別業以祀之  
歲時攜諸甥上塚酌奠而去歔歔竟日自恨終鮮兄弟  
而以公之遠托於中表也能縷述其家事故嘗冀聞公  
之言以為喜今誠得公文以侑觴庶其足慰母心乎余  
自罹家難神思耗潰絕未嘗為人作文字然每見母黨  
輒憶吾母生平不置故能為孺人壽者誠莫如予宜孺  
人年纔半百偕亦沆從容舉案三子雍睦諸孫五六人  
奉觴而進之鄉里傳歎以為盛事故知天之鍾報於其

身者信未有艾也微二子請余其能已於言乎



湛園集卷二